

Skýrsla stjórnar UT-kvenna fyrir 2007-2008

Fagfélagið UT-konur var stofnað 25. maí 2005 á stofnfundi þess í Háskólanum í Reykjavík og eru félagar alls 105 (febrúar 2008).

Aðalfundur félagsins 2007 var haldinn 26. apríl kl. 17:00 á 3. hæð í Háskólanum í Reykjavík og var dagskrá samkvæmt samþykktum félagsins.

Kjósa þurfti í stjórn og formann fyrir árið 2007-2008.

Auður Sigr. Kristinsdóttir, Ásrún Matthíasdóttir, Bergþóra Ketilsdóttir, Hólmfríður Pálsdóttir og María Guðnadóttir gengu úr stjórn en í stjórn voru kosnar:

- Þóra Halldórsdóttir, formaður
- Anna Ingólfssdóttir
- Elín Granz
- Hrönn Þormóðsdóttir
- Jóna Pálsdóttir
- Sigrún Þöll Þorsteinsdóttir
- Þórunn Óskarsdóttir

Ásrún Matthíasdóttir lét því af störfum sem formaður, en hún hafði starfað sem formaður félagsins frá stofnun þess fyrir þremur árum. Nýr formaður var kjörinn Þóra Halldórsdóttir.

Í upphafi fundar ávarpaði dr. Svafa Grönfeldt, rektor Háskólans í Reykjavík fundargesti og ræddi meðal annars um mögulegar leiðir til að efla áhuga ungs fólks í dag að sækja nám í tölvunarfræði.

Að lokinni hefðbundinni dagskrá fjallaði dr. Margrét Jónsdóttir, dósent við viðskiptadeild HR um Konur og tungumál – leiðin að orðræðu árangurs.

Veitingar voru í boði Háskólans í Reykjavík.

Stjórnin hefur haldið reglulega fundi mánaðarlega. Á fyrstu fundum stjórnar var rætt um hvernig félagið ynni best að markmiðum sínum og hvaða áherslur ættu að vera í starfinu á þessu starfsári. Þótti stjórnarmönnum brýnt að koma vefsíðumálum í betra horf, kynna félagið betur og auka áhuga meðal yngri kvenna á félaginu. Áfram var áhersla á að efla innra starf með fræðslu- og skemmtifundum.

1. Morgunverðarfundur var haldinn 21. mars 2007 í Farfuglaheimilinu í Reykjavík, Sundlaugavegi 34, þar sem Hannes Högni Vilhjálmsson fjallaði um “Félagslega tölvutækni sem kennir tungumál og siði framandi þjóða”. Erindi hans var mjög áhugavert og vakti lukku.
2. Í apríl 2007 gaf félagið út kynningabækling um upplýsingatækni sem sendur var til allra 15 ára og 18 ára stúlkna á Íslandi. Tilgangur bæklingins var að vekja áhuga ungra stúlkna á upplýsingatækni og sýna fram á að störf í upplýsingatæknigeiranum snúast ekki eingöngu um forritun. Leitað var eftir styrkjum og fengust þeir frá menntamálaráðuneytinu, iðnaðar og viðskiptaráðuneytinu, Háskólanum í Reykjavík og Skýrslutækni félagi Íslands.
Ákveðið var að taka viðtöl við þrjár ungar konur í bæklingnum og fenginn var ljósmyndari til að mynda þær. Félagið fékk góð viðbrögð frá stofnunum og fyrirtækjum með þetta framtak og vonandi verður hann til þess að hvetja ungt fólk til

að velja upplýsingatæknimenntun í skólakerfinu.

Til stóð að fylgja útgáfunni eftir með fjölmiðlaumfjöllun, en sökum ýmissa þátta, s.s. að sú vefsíða sem gefin var upp á bæklingnum virkaði ekki, þá var horfið frá því.

3. Á vordögum, strax í upphafi starfsárs nýrrar stjórnar, var lögð vinna í að koma upp nýrri heimasíðu fyrir félagið og er slóðin www.utkonur.wordpress.com. Ástæðan fyrir því að við fluttum okkur frá vefsíðu undir SKY var meðal annars sú að erfitt var að halda þeirri síðu líflegri auk þess sem við höfðum ekki nema takmarkaðan aðgang að þeim síðum sem tilheyrðu okkur. Það krafðist því oft aðstoðar þriðja aðila til að koma upplýsingum á framfæri sem gerði vinnu okkar tímafreka og var oft á tíðum mjög flókið ferli við að koma einföldum upplýsingum á framfæri á síðunni.
4. Ut-konur voru í maí 2007 boðaðar til fundar hjá forsætisráðuneytinu til að ræða þá stöðu sem nú virðist komin upp, að viðvarandi skortur er á fólki með menntun á sviði upplýsingatækni og lítill áhugi meðal framhaldsskólanema á að sækja það nám. Fundinn sóttu fulltrúar frá háskólum landsins, ráðuneytum og félögum á þessu sviði. Björn Þór Jónsson, dósent við HR átti frumkvæði að þessum fundi og sagði hann frá mati sínu á stöðunni. Farið var yfir stöðu upplýsingatækninnar í skólakerfinu, rætt um hvernig hægt er að safna upplýsingum til að meta stöðuna, ásamt mögulegum viðbrögðum til að bæta hana og kannaður var áhugi fundarmanna á að taka þátt í aðgerðum til að bæta stöðuna. Í kjölfarið voru myndaðir tveir vinnuhópar og áttu UT-konur tvo fulltrúa í öðrum þeirra.
5. Breytingar urðu í stjórn UT-kvenna á árinu, þar sem Elín Granz sagði sig úr stjórn og Anna Ingólfssdóttir dró sig í hlé um skeið, en í hennar stað kom inn Marta Lárusdóttir, lektor við Háskólann í Reykjavík.
6. Þann 20. nóvember héldu UT-konur skemmtilegan umræðufund á Grand Hótel undir yfirskriftinni „**Draumavinnustaðurinn og bestu leiðir við að leysa verkefni**“. Umræðustjórn var í höndum Guðbjargar Lindu Rafnsdóttur og kom hún með ýmis ný sjónarhorn og fróðleik inn í umræðuna. Skiptust UT-konur á skoðunum og sköpuðust fjörlegar umræður.
7. Starf vinnuhópa mætti vera öflugra en þeir hafa ekki verið mjög virkir. Huga þarf að því að efla starf þeirra og virkja fleiri félaga til þátttöku.
8. UT-konur tóku þátt í að efla eða endurvekja Kvennaslóðir sem er gagnagrunnur um konur, sjá www.kvennaslodir.is

Framtíðarsýn

Eitt helsta umræðuefni stjórnar hefur verið um leiðir til að auka þátttöku UT-kvenna í starfi félagsins og einnig hvernig laða megi ungar konur í félagið en engar töfralausnir hafa fundist enn sem komið er.

Rætt hefur verið að áherslurnar í félaginu megi heldur ekki verða of einsleitar, þar sem við erum félag kvenna í upplýsingatækni og það spannar vítt svið. Víkka þarf hóp UT-kvenna eins og hægt er þannig að félagar komi úr sem flestum sviðum upplýsingatækninnar.

Einnig hefur dræm aðsókn kvenna í nám í upplýsingatækni verið til umræðu.

Mikilvægt er að halda áfram að efla tengslanet innan UT-kvenna með fræðandi og skemmtilegum atburðum en einnig að halda áfram markvissu kynningarstarfi á upplýsingatækni t.d. með því að nýta meira fjölmiðla.

04. febrúar 2008

Þóra Halldórsdóttir, formaður UT-kvenna